

EMBDENA



EMBDENA, Frisiae Orientalis vrbs. Metropolitico honore conspicua, recenti hominum memoria, ad summum vrbs quam optime constituta, splendore euecta, plurima hominum admiratione digna ostendit, quorum vel singula saltem beneformatam Politiam conservare, opumque affluentia beare queant. Mercatoribus habitatur ditissimis, aedibus & publicis & privatis superbissime colitur. Portu amplissimo, plurimarum navium capace, adeo se commendabilem reddit, ut non existimem in uniuersa Batavia, Frisia aut Belgio demum reliquo, similem portus commoditatem inueniri, in quo ad vallum & moenia usque vrbs, tutissima nauibus statio praebetur. Quo fit, utemporium nunc sit populosum, & amplissimos negotiatores ex remotissimis mundi partibus huc ad se prouocet atque alliciat. Hinc superioribus annis, dum Anglorum natio in Brabantia Antuerpiam deserit, Embdenam potissimum delegit, ut ibi pannorum & Britannicarum mercium, Stapulum, vulgo *Staabel*, constituerent, quo factum est, ut remotissimarum gentium negotiatores, qui eas sibi merces, non tam necessarias, quam elatioribus & delicatulis gratas comparent, magno frequentique numero Embdenam inuiserint, quas deinde ingenti pecunia Francoforti ad Moenum in nundinis distrahunt. Nunc vero etiam negotiatores Angli, quorum nonnulli gratioribus plerisque viris futiles & leuiiores esse homines videntur, hanc quoque urbem, uti primum in Flandria Brugas, tum in Brabantia Antuerpiam, residentia deserentes, Hamburgum nobile Saxoniae oppidum, aquis, & varijs ad negotiationem commoditatibus praestans, concesserint: nihilo tamen secius, mirandum in modum Embdena mercimonijs floret, publicis priuatisque edificijs tantis exornatur sumptibus, ut stuporem videntibus moueant. Maxime, si quis magnificam noui praetoris structuram, eam quoque ciuitatis partem aspiciat, quam adauctam nuncupant, in qua praeter elegantes ciuium aedes, Euripos & canales videre est plurimos, quibus multorum onerum naues in ipsam urbem admittunt. Frequentissimus siquidem hic maximarum nauium quotidie, ex remotis totius uniuersi locis, ex Littonia, Noruegia, & reliquis septentrionalibus regionibus, ex Gallia item, Anglia & Hispania appulsus, adeo, ut Embdensi in portu, nullo non tempore, florentissima maximarum nauium classis, fida, tutaque statione utatur. Ita ut nunc celeberrimi emporij fama exteris Embdena innotescat. Arcem etiam habet, quae validis propugnaculis firma, & marinis circumfusa aquis, urbem in tuto collocat, quam eius territorij Comes tenet. Is Romano Imperio pareat, neque alium existimo portum marinum esse Imperio tanta oportunitate praestanti, florentem. Mira hic omnium rerum & exuberans copia videtur, non earum modo, quibus satis necessitati fieri, sed & quibus voluptatis studium concitari queat. Praestat hoc ciuibz, tam portus & importationum commoditas, quam natia Frisiae vbertas. Agrum siquidem planum, & pascuis foecundum, naturae beneficio obtinet, cuius quidem, quam glutinosae & pingues sint glebae, quam feracia sint pascua, quam numerosi armentorum & pecudum greges, vix verbis explicari potest. Docet id exquisiti delicatque saporis butyri & casei ad miraculum usque copia, quae vberissimo Embdensium quaestu & emolumento maximo, ad varias regiones & per uniuersam Germaniam deferunt. Quinetiam non obscure hoc comprobant, pingues & supra vulgarem magnitudinem boues, quorum aliquot myriades in pascuis passim oberrare videntur, qui soli graminumque beneficio adeo impinguescunt, ut exterarum etiam nationes ijs potissimum delectentur. Ex candidissimo etiam sale, quod indigenarum industria conficitur, nomen Embdena meruit. Quod si incolarum conditionem quis scire desideret, eam Aenaeas Syluius diligens perlustrator Europae subiungit. Gens inquit Frisiorum ferox & armis exercitata, robusti & proceri corporis, securi atque interpidi animi, liberam se esse regloriatur, quamuis Philippus Burgundiae Princeps, eius se terrae dominum vocet. Re vera, libera Phrygia est, suis vtens moribus, exteris nec parere sustinet, neque dominari cupit: haud inuitus Phryso pro libertate mortem oppetit. Dignitas in hac gente militaris inuisa, sublimem virum, qui se ceteris efferat, non ferunt: Magistratus annuos eligunt, qui rempub. aequo iure disponant. Foeminarum impudicitiam seuerius puniunt. Sacerdotes, ne aliena cubilia polluant, sine coniuge non facile admittunt. Vix enim continere hominem posse, & supra naturam arbitrantur. In pecoribus omnis eorum substantia est, ager planus ac palustris est, multo gramine foecundus, ligno caret. Bituminoso, cespice, & sicco stercore bouum ignes fouent, & cat.